



### **Dumonda da partecipaziun a la società anonima MENSA e cumpra d'acziun**

Il proget mia Engiadina prevezza da fabricar sù d'ürant ils prossems ons tanter Samignun e La Punt -Chamues-ch üna rait da fibr'optica. La MENSA (Mia Engiadina Network SA) es respunsabla per la rait da fibr'optica, v.d. per la colliaziun principala da datas tanter Landquart e l'Engiadina. Il Cumün da Zernez es tras l'EE-Energia Engiadina fingià acciunari da la MENSA per las fracziuns da Susch e Lavin. Illa fracziun da Zernez invezza fabrica sù l'EW Zernez la rait da fibr'optica. La suprastanza ha trattà ed approvà la dumonda da partecipaziun a la società anonima MENSA e la cumpra d'acziun per la fracziun da Zernez.

### **Refacziun da la punt da Grialetsch a Susch – dumonda da princip per proseguir culla submitsiun**

La punt da Grialetsch sù vers il Pass dal Flüela sto gnir sanada. La dumonda da credit da chf 50'000 es gnüda sancziunada a la radunanza cumünala dals 2 december 2016. La suprastanza ha approvà la glista da submitsiun per surdar las lavurs per refar la punt da Grialetsch.

### **Sanaziun da la via Ertaset a Zernez – dumonda da princip per proseguir culla submitsiun**

La radunanza cumünala dals 12 december 2017 ha deliberà il credit da chf 100'000 per refar punctualmaing la via dad Ertaset a Zernez. La glista da submitsiun per surdar talas lavurs es gnüda approvada.

### **Sanaziun da la sarinera a Zernez – dumonda da princip per surdar las lavurs da progettaziun**

La sarinera da la fracziun Zernez es in ün nosch stadi e sto gnir sanada. Quai chi'd es fich necessari, ed üna da las prümas lavurs d'execuziun, es da garantir darcheu la qualità e la cuntinuità da la biologia. Tenor pretaisa da l'uffizi da l'ambient e natüra dal chantun Grischun es quella revisiun la plü urgianta. Il credit da chf 115'000 es gnü approvà a la radunanza cumünala dals 12 december 2017. Per pudair cumanzar a progettar ha la suprastanza sancziunà l'inizi dal proget e surdat l'incumbenza a la ditta Caprez SA a Scuol.

### **EW Zernez – colliaziun vasca camping fin TS Cul – decisiun da princip da proget e surdatta d'incumbenza da fabrica**

Causa il proget d'incablament „Netzentwicklung Engadin“ sto gnir fabricada üna nouva colliaziun da büschens vöds per forz'electricca e fibr'optica tanter la vasca camping e la staziun da transfuormaziun in Cul a Zernez. L'inizi dal proget es gnü sancziunà e la lavur d'impressari surdatta a la firma Costa AG a Zernez.

### **Reelecziuns ed elecziuns da las autoritats cumünalas per la perioda d'uffizi 2019 - 2022**

La suprastanza cumünala ha discus sur da las reelecziuns ed elecziuns cumünalas per la prosma perioda da legislatura. Las reelecziuns ed elecziuns da las autoritats cumünalas a l'urna han lö illa seguonda mità dal 2018. I sarà da far quint cha ün(a) o l'oter(a) supstant(a) nun as metta plü a disposiziun. Las votantas ed ils votantas dal Cumün da Zernez as dessan far impissamaints sur d'ün ingaschamaint politic a favur dal Cumün da Zernez.

### **Survista dals progets e da las pendenzas**

La suprastanza cumünala ha repassà tuot ils progets e las pendenzas da mincha supstanta e mincha supstant. Uschè es la suprastanza orientada sur dals progets chi sun actualmaing in trais-cha.